

KU HETISEKA

 Ndza ku khensa, makwerhu. Ndza ku khensa, Makwerhu Hoekstra.

I madyambu lamanene, eka Houston. Hakunene lowu ndzi wu tekela enhlokweni tanahi nkateko lowukulu, wa ku va lahawani nakambe vusiku lebyi eHouston. Ku vile malembe yo tala hi mpfhuka ka loko ndzi vile na nkateko wa ku va lahawani. Nakona a ndzi tshamile, ndzi ri karhi ndzi yingisela vusiku lebyi eka un'wana na un'wana wa swivulavuri leswi.

² Nakona siku rin'wana, loko ndzi endlile vululamiselo bya nchumu wun'wana, ndzhawu yin'wana, nakona a ndzi swi tiva leswaku vana lavaya a va langutanile na rifu, ndzi anakanyile leswaku, "Loko swin'wana swi nga humeleta eka vana lavaya, a ndzi nga pfuki ndzi tirivalerile," hi ku ka ndzi nga ta nga lahawani ku ta nyika vonele ra mina na ku endla hinkwaswo leswi a ndzi ta swi kota, ku pfuna manana na tatana lava, na vana lava, na ku endla hinkwaswo leswi a ndzi ta swi kota eku ponisiweni ka vutomi bya bona.

³ Naswona Houston yi na...i ndzhawu ya xitsundzuxo eka mina. Yi khoma switsundzuxo leswikulu swo tala eka mina leswi ndzi nga swi hlayisa emiehleketweni ya mina hi mpfhuka ka loko ndzi rhangile ndzi endla ku vhakacha ka mina lahawani eka malembe yo tala lawa ya nga hundza, kona kwala ku ya eHerald Of Faith, Makwerhu Kidson, kutani ku rhelela lahawani eholweni leyikulu loko ndza ha ri lahawani na Makwerhu Raymond Richay na vavuli va rito va doroba.

⁴ Kutani, i ntivyiso, Nkul. Ayers, Nkul. Kipperman, hi vusiku lebyi xiteka-swifaniso xi nga swi khorwisa leswaku a ndzi nga vuli nchumu lowu nga hoxeka. A ku ri Ntiyiso. Nakona loko tihlo ra vukhanikhi ra xiteka-swifaniso ri khoma xivono xa... kumbe, ku nga ri xivono; xiviri. Kreste loyi hi n'wi chumayelaka na ku n'wi rhandza swonghasi, a ri na hina. U tshembhisile ku va na hina, naswona xiteka-swifaniso xi tekile xifaniso xa Yena. Minkarhi yo tala ndzi swi vurile, eka minkarhi leyi nga hundza, leswaku—leswaku a ndzi ta vona Rivoni leriya nkarhi hinkwawo. Kambe nkarhi wun'wana vanhu a va ta va na ku kanakananyana hi Rona, leswi a wu ta swi pfumela leswaku a va ta va hi ndllela yaleyo, kambe hi vusiku lebyiya ri swi khorwisile. Walowo a ku ri nkarhi wo rhanga ku va Ri tekiwa.

⁵ Hi mpfhuka ka sweswo, Ri tekiwile minkarhi yi nga ri yi ngani. Ejarimani sweswinyana, ri rhelerile ehansi, loko ntoto wu ri kona, na loko Ri tlhelela endzhaku nakambe. Nakona swilo leswiya a hi swo kurisa xivumbiwa xin'wana xa ximunhu,

kambe i swo kombisa Vukona bya Yesu Kreste exikarhi ka vanhu va Yena.

⁶ Nakona hi pfumela leswaku Hosi Yesu la fanaka u kona vusuku lebyi, ku hi pfuna eka mhangu leyi. Nakona ndzi pfumela leswakulu U ni ku tsakela eka swona ku tlula hilaha hina hi nga va ka hakona. Nakona hakunene ndzi le ka ntwela vusiwana na vatswari va vana lava, na ku va na katla eka katla na wanuna na wansati un'wana na un'wana la ringetaka ku va ntshuxa etinhlayeni ta rifu.

⁷ Kutani, sweswi, ndza swi twisisa leswaku leyi a hi nhlengeletano ya mpfuxelelo, kambe ntsena i—i nonganoko wa tinhlengeletano ta xikhongelo leti khomiwaka hikwalaho ka mimoya-xiviri leyi tshameke emindzhutini ya rifu. Naswona ndzi hlwerile swinene. A ndzi nga vulavuli nkarhi wo leha.

⁸ Kambe ndzi nga tsakela ku koka tsalwa, kumbe mongo, swa antswa, ku suka eka tsalwa leri ndzi nga tsakelaka ku ri hlaya eka tindzhawu timbirhi eMatsalweni. Kutani n'wina mi nga na Tibibele, loko mi nga pfula na mina swa xinkadyana, eka buku ya Vafilipiya, kavanyisa ka vu1, na ndzimana ya vu20 ya kavanyisa ka vu1 ka Vafilipiya.

Ku ya hi ku langutela ka mina loku tiyeke na ku tshembha ka mina, leswaku ndzi nga ka ndzi nga khomisiwi tingana ha nchumu, kambe...hi ku tiya hinkwako, tani hi minkarhi hinkwayo, swingaleswi sweswi nakambe Kreste u ta tvarisiwa emirini wa mina, hambi ku ri hi...ku hanya, kumbe...rifu.

⁹ Kutani eka, nakambe, eka Buku ya Mintirho, kavanyisa ka vu2 na ndzimana ya vu30. Ndzi nga ha hlaya ya vu25 ku ya eka ya vu30.

Hikuva Davhida a vulavula mayelana na yena, hikuva a ndzi vona Hosi minkarhi hinkwayo emahlweni ka mina, hikuva yi le vokweni ra mina ra xinene, leswaku ndzi nga tsekatsekisisiwi:

Hikokwalaho mbilu ya mina yi tsakile, ni ririm i ra mina a ri tsakile; ngopfu-ngopfu na wona miri wa mina wu ta wisa hi ku tshembha:

Hikuva a ndzi nga wu tshiki moy-a-xiviri wa mina etiheleni, kumbe a ndzi nga N'wi tshiki Mukwetsimi wa wena a vona ku bola.

U ndzi tivisile ndlela ya vutomi; u ta ndzi tata hi ntsako lowu humaka emahlweni ka wena.

Vavanuna na varikwerhu, mi nge ndzi mi byela ndzi ntshuxekile hi ta mupatriyaka Davhida, leswaku havumbirhi u file naswona u lahliwile, kutani sirha ra yena ri na hina ku fika namuntlha.

Hikokwalaho ka leswi a ri muprofeta, na ku tiva leswaku Xikwembu a xi hlambanyile ka yena hi xihlambanyo, leswaku ku ya hi muhandzu wa matshenge ya yena, ku ya hi nyama, xi ta tshamisa Kreste exiluvvelweni xa yena;

Yena, hikuva a swi vonile leswi swi nga si humelela u virile ta ku pfuka ka Kreste, leswaku moyaxiviri wa yena a wu tshikiwanga etiheleni, hambi nyama ya yena a yi vonanga ku bola.

¹⁰ A hi korhamiseni tinhloko ta hina swa xinkadyana eka xikhongelo.

¹¹ Tata wa hina la nga Matilweni, hi khensa swinene eka Wena hikwalaho ka ntsetselelo. Nakona i ntiyiso, Hosi, hi xona xivangelo xa ku va hi ri laha vusiku lebyi, i ku kombela ntsetselelo. A hi nga ta swi kombela leswi loko a hi nga ri na ripfumelo ra ku pfumela leswaku hi ta nyikiwa swona. Vavanuna va hahile ku tsemakanya tiko, naswona swikhongelo swi le ku yeni ehenhla hinkwako-nkwako, ku ya eka Wena, leswaku vutomi bya lava hi nga ku va khongeleteni hi matimba vusiku lebyi ingaku byi nga tsetseleriwa. Hosi, hi kombela ntamu eka vamanana na vatatana va vantshwa lava.

¹² Nakona tanihi laha hi swi twisisaka hakona, leswaku, jaha leri ri hundzuluxele vutomi bya rona eka Wena nakona ri lava ku tirthela Wena. Nakona tanihi laha hi nga twa un'wana wa swivulavuri a vula, leswaku, a lava ku va muvuri wa Evhangeli. Ndza khongela Xikwembu leswaku U ta nyiketa nkateko lowu eka nakulorhi lontsongo.

¹³ Hi rivaleli swidyoho swa hina, basisa timbilu ta hina eka mianakanyo leyo biha, na swin'wana na swin'wana leswi swi nga va ka etindleleni ta hina leswi swi nga sivelaka xikhongelo xa hina ku va xi hlamuriwa eka vanhu lava.

¹⁴ Tanihi laha hi hlayeke Rito ra Wena, ha swi tiva leswaku ha vumbirhi matilo na misava swi ta hundza kambe Rito ra Wena ri nga ka ri nga tsandzeki. Ha khongela leswaku U ta hi engetelela, hi Moya lowo Kwetsima, tsalwa leri nga ta teka, leri nga ta va ku rhandza ka Wena ka Vukwembu eka mhangu leyi sweswi, tanihi laha hi nga twa gqweta na vo tala va ri karhi va vulavula. Naswona ha khongela leswaku hi ta kuma ntsena leswi hi faneleku ku swi endla hi ku landzela. Xana goza ra hina leri landzelaka leri hi faneleku ku ri endla i yini-ke? Hosi, hi lahawani ku ta ri endla. Hi tivise rona, Hosi, hi Rito ra Wena. Hikuva ha swi kombela hi Vito ra N'wana wa Wena, Hosi Yesu. Amen.

¹⁵ Ku hlaya tindzimana leti tintsongo, naswona ndza swi lemuka leswaku xiendlakalo i xikulu, hikuva i mhangu ya nkoka. A ndzi ta ehleketa, loko ndzi twile na ku kuma thelegiramu ya manana luya, "A swi ta va njhani loko leriya a ku ri jaha ra

mina ri tshameke eka rheyi liya, kumbe wanhwana wa minake?” Kutani ndzi . . . Hi lava ku veka hinkwaswo leswi hi nga swi kotaka eka swona.

¹⁶ Kutani van’wana va nga vula leswaku, “Kunene, sweswo ntsena a ku ri xiphemu lexintsongo swinene xa Rito, lexi u nga xi hlaya, Makwerhu Branham.” Kunene, sweswo swi nga va swi ri ntiyiso, na swona. Kambe, ma swi vona, a hi—a hi makulele, kumbe ntsengo wa marito. Hi leswi ya vulaka swona. Ntsena i—ntsena i . . . Leswi swi nga swona, i xitshembhiso xa Xikwembu.

¹⁷ Nakona ndzi lava ku koka ku suka eka vusiku lebyi, ku suka eka tsalwa leri vusiku lebyi, kumbe dyondzo ku suka eka: *Ku Hetiseka*.

¹⁸ Ndzi langhile ndzimana leyi, xinkadyana lexi nga hundza, ndzi tshamile ekamareni ya mina ya xihodelani, hikuva ndzi ehleketa leswaku sweswi hi lava xin’wana lexinene, ku hetiseka kun’wana loku hi nga khomelakata kona na ku swi tiva leswaku i ka ntiyiso. Eka awara yo nonohwa kukotisa leyi, hi fanele ku va na xin’wana lexi hi nga na ku tshembha, sweswo swi lulamile, xin’wana lexi hi nga khomelakata eka xona, ku swi tiva loko ku ri leswaku, hilaha mhangu yi fambaka hakona.

¹⁹ Sweswi, hi ku ya hi—hi Webster, ku *hetiseka*, kona hi koxe, i “ku kala mpimo eka matimba,” naswona hi ku sungula i “xo hetelela.” Nakona *xo hetelela* i “amen.” Hi xona ku hetiseka. Tanihi leswi xi . . . Yalawa i makumu. Xexo xi hinkwaswo.

²⁰ Sweswi, xifikeleriwa xin’wana na xin’wana lexikulu lexi nga tshama xi va kona emisaveni, xi bohiwile eka muxaka wun’wana wa ku hetiseka. U nga ka u nga endli nchumu handle ka loko ku ri na xin’wana lexi u nga khomelakata eka xona.

²¹ Loko jaha ri ya eku tekeni ka wansati lontsongo, ri fanele ku tiva vumunhu bya wansati loyi lontsongo. Kumbexana wansati lontsongo u fanele ku tiva vumunhu bya jaha leri, xin’wana lexi a nga khomelakata eka xona. “Xana wanuna loyi u ta va wanuna wo lulama—ke? Xana u ta endla muxaka wa kahle wa nuna eka mina—ke?” “Xana wansati loyi u ta ndzi nyika, evuton’wini, leswi ndzi—leswi ndzi swi langutelakata eka yena, ku tshembheka na swin’wana na swin’wana—ke?” Kutani swi fanele ku va kun’wana laha va nga vekaka swihlambanyo swa vona—swa vona kona, va ri karhi va swi tiva leswaku ku na xin’wana lexi nga ta khomelela. Nakona xexo hi xona xivangelo xa ku va hi va tisa ekerekeni, na le Ritweni ra Xikwembu, ku ta endla leswaku ku hetiseka loku ku va ku bohiwile.

²² Sweswi, Paul lahwani, tanihi laha hi swi vonaka, a ri na ku hetiseka loku a khomelerile kona, vutomi bya yena hinkwabyo, endzhaku ka ku hundzuka ka yena, loku a ku ri: vutomi lebyi nga na Kreste exikarhi! Nakona i ndzhawu ya njhani ku va na ku hetiseka: vutomi lebyi nga na Kreste exikarhi! I vutomi lebyi hambaneke na lebyi a nga byi hanya nkarhi wun’wana,

hikuva u te, “Vutomi lebyi sweswi ndzi byi hanyaka,” lebyi a byi hambanile na lebyi a nga byi hanya.

²³ Naswona ku tile nkarhi lowu Paul a nga va na ntokoto lowu wu nga n’wi yisa eka xiboho lexi. Hikuva, Paul a ri lonkulu, wanuna wa matimba exikarhi ka Vayuda, na—na mutivi wa vukhongeri lonkulu, kambe a nga ri na ntiyiso ngopfu hi laha a yima kona. Kambe siku rin’wana, egondzweni ra ku ya eDamaska, Rivoni, Langavi ra Ndzilo, ri xikerile ehansi ku suka eTilweni. Kutani Paul, leswi a ri Muyuda, a swi tiva leswaku Rivoni leri, Langavi ra Ndzilo, ri vile Nchumu lowu wu nga, Xikwembu lexiya xi nga rhangela vanhu va ka vona ku huma eEgipta. Va landzelerile Langavi leri ra Ndzilo. Swingaleswi, leswi a ri Muyuda, u N’wi byerile, hi xihatla, “Hosi, U Mani xana?” A N’wi tiva tanahi “Hosi,” kambe, “U Mani xana?”

²⁴ Kutani Rito ri vuyile endzhaku ku suka eka Langavi ra Ndzilo, “Ndzi Yesu, nakona swa nonohwa eka wena ku khadlanya risungunu.” Ku sukela nkarhi walowo ku ya emahlweni, Paul u swi tivile leswaku Yehovha wa Testamente ya Khale a ri Yesu wa Leyintshwa. Nakona u vile na xin’wana lexi a ta khomelela eka xona, nakona sweswo hilaha a nga kota ku tsala buku liya yikulu ya Vaheveru.

²⁵ Sweswi, loko wena, loko evuton’wini bya wena u ri na ku hetiseka, u endla swilo leswi hi ntolovel a wu nga ta swi endla, ngopfu-ngopfu loko u ri na vutomi lebyi nga na Xikwembu exikarhi. Vutomi lebyi nga na Xikwembu exikarhi byi endla munhu a endla swilo leswi hi ntolovel a nga ta swi endla; leswi swi nga twisisekiki ngopfu, leswi swi nga tollovelekangiki. Hikokwalaho ka yini vutomi bya Vukreste byi ri lebyi nga twisisekiki na ku va lebyi nga tollovelekangiki ke? Swi hikokwalaho ko va byi languterile eRitweni ra Xikwembu, leswi hakanyingi swi nga tivekiki eka misava namuntla.

²⁶ Sweswi, hi na tikereke, naswona hi na mavandla, naswona hi na vukhongeri, oho, byo tala bya byona, ku rhendzeleka na misava.

²⁷ Eka minkarhi ya mina ya nkombo hi ku rhendzeleka, hi mpfhuka ka loko ndzi vile na n’wina lahwani eHouston, ndzi kumile vutivi byo tala hi swikwembu na vukhongeri bya misava leyti. Kambe sweswo a hi swona leswi ndzi vulavulaka hi swona.

²⁸ Ndzi vulavula hi ku hetiseka, loku hlanganisiweke na Kreste. Kutani, ku ku endla mu—munhu la nga twisisekiki. U endla swilo leswi swi nga twisisekiki. Ku ehleketa ka wena hinkwako-nkwako ku hambanile ku tlula ku ehleketa loku u nga tshama u va na kona, hikuva u kumile xin’wana, lexi u nga khweketa ripfumelo eka Un’wana loyi a nga tumbuluxa matilo na misava. Leswaku, Rito leriya ra Yena hi Roxe hi leri ri tumbuluxaka, Xikwembu Lexi nga vulavula misava yi va kona, nakona ku hava xilo lexi nonohwaka ngopfu eka Xona. Swingaleswi swi ku

endla loyi a tumbuluxaka, wena n'winyi, hikuva u teka Marito ya Xona. Naswona rito i mianakanyo leyi nga kombisiwa.

²⁹ Sweswi, Paul a fikile eka xiyimo xexo, ku ya laha a nga ri—a nga ri na ntokoto wa ntivo-vukhongeri, hinkwakonkwako, kambe a ri na mbhoni ya yena n'winyi. U hlanganile na Xikwembu, nakona a swi tiva leswaku a vitaniwile hi Xikwembu. Nakona—nakona a ku nga ri na loyi a fanele ku n'wi byela nchumu hi mayelana na swona. A ri na ntiyiso lowu hetisekeke leswaku Xikwembu a xi tama xa ha ri Xikwembu. Loko misava ntsena yi nga endla sweswo.

³⁰ Nakona loko ntlawa lowu vusiku lebyi, wu tshameke lahwani, wu nga swi tsundzuka leswaku Xikwembu xi tama xa ha ri Xikwembu. Xa ha swi kota ku hlamlula eka mhangu leyti tanahi laha Xi nga hakona eka mhangu ya ku horisa ka Vukwembu kumbe xin'wana na xin'wana. Xi tama xa ha ri Xikwembu. Nakona loko hi nga aka mintshembho ya hina, ku nga ri mintshembho ya hina ntsena, kambe mianakanyo leyileyinene, ehenhla ka leswi Xi swi vulaka. Nakona ha swi tiva leswaku Swi Ntiyiso.

³¹ Nakona vanhu va tikhoma hi ndlela yo hlekisa. Va tikomba va rivala hi mayelana na tlhelero biha hikuva va kumile ku hetiseka, hikuva i Rito ra Xikwembu. Yesu u te, “Matilo na misava swi ta hundza, kambe Rito ra Mina ri nga ka ri nga tsandzeki.” Swingaleswi loko hi ri na Rito ra xitsembhiso, kutani ku hava ku tsandzeka eka Rona. Ri nga ka ri nga tsandzeki.

³² Swingaleswi ndzi—ndzi pfumela leswaku leswi tinhlengeletano ta xikhongelo lahwani, va—vanhu va vukhongeri va Houston, leswi va swi tsakelaka, i vutomi bya vanhu. Nakona sweswo hi leswi hi nga hlengeletanelia swona lahwani, i ku—i ku vitana matimba lawa ya nga ekule na milawu na matimba lawa ya nga endliwa hi munhu, xin'wana Lexi nga cincaka timbilu ta vanhu, kukotisa hilaha Xi nga endla Faro hakona eEgipta. Nakona hi Xona—hi Xona Xikwembu. Nakona hi fanele ku yima sweswi ku langutisa eka—eka tlhelero biha, kutani hi ya eku languteni eka tlhelero lerinene.

³³ Nakona loko u nga si va na ripfumelo, u fanele ku va na xin'wana lexi u nga ta va na ripfumelo eka xona. Nakona hi swihi swo tala leswi u nga tshembhelaka ripfumelo eka swona ku tlula leswi swi nga swi endlaka eka Rito ra Xikwembu lexi hanyaka, leswi nga tumbuluxiwa, matimba ya la nga ni Matimba hinkwawo-ke? Xana hi swihi swin'wana leswi hi nga vekaka mintshembho ya hina eka swona-ke? Hikokwalaho swi ku endla u languteka ku hambana, u endla ku hambana. U languterile ku va Xikwembu xi fikelela xitsembhiso xa Xona. Kutani loko ku tikeriwa ku pfuka, kukotisa loku hi nga na kona sweswi, hi Xona khokholo. I nchumu wun'wana lowu—lowu wu ku khomaka, i

nchumu wun'wana lowu u nga bohiwa eka wona. I xitshembhiso xa leswaku hi bohiwile, Rito ra Xikwembu ri tano.

³⁴ Ntsena kukotisa hilaha khokholo ri nga ku hetiseka eka xikepe, hi nkarhi wa xidzedze. Xikepe xi nga va xi ri karhi xi tluta elwandle. Khokholo ri le handle hi le mahlweni. Hi rona . . . Vuwiselo bya xona. N'wina vanhu lahawani eHouston, mi nga ekusuhi swinene na lwandle, vonani swikepe loko swi nghena.

³⁵ Kutani hikokwalaho ka yini ku rhwariwa ntiko lowu wo engeteleta wa khokholo leri rikulu ra matimba-ke? Kambe, ma swi vona, loko swidzedze swi ta, swi—swidzedze leswi levaka leswi handzulelaka lwandle, na ku va swi nga cukumetela xikepe eribuweni kun'wana, na ku xi pyanya, kumbe ku xi hundzuluxela emamatini lawa ya nga entangiki; xi nghena eka mati yo enta, kutani xi enhlisa leri rikulu, khokholo lerikulu, leri nga khweketiwa leswaku ri ta kokova ehansi ka lwandle kukondza ri haka ehenhla ka ntshava yin'wana leyi nga vonakiki. Kutani swidzedze leswiya swi nga kelema loko swi swi lava; xi na ku hetiseka. Khokholo ri khomelela kun'wana lahaya, kambe ri—ri tiyisile. Nakona loko xikepe na magandlati ya ba ku rhendzeleka na xikepe, xi na ku hetiseka, hikuva xi bohiwile.

³⁶ Kutani yaleyo i ndlela leyi wanuna a nga xiswona loko a bohiwile eka Kreste na le Ritweni ra Yena, na ku va a Ri pfumela. Ku na ku hetiseka lahaya, xin'wana lexi xi n'wi khomaka.

³⁷ Ku hetiseka ku kotisa nyeleti ya n'walungu loko u lahlekile. Loko u—loko u lahlekeriwile hi ku kongoma ka wena, naswona u lava ku kuma ndlela ya wena ya ku tlhelela endzhaku, nyeleti ya n'walungu i ku hetiseka. Sweswi, ku na tineyeleti tin'wana, kambe ti rhendzeleka na misava. Loko misava yi ri karhi yi hundzuluka ku rhendzeleka hi tona, yi . . . yi hundzulukela ekule na tona. Nakona . . . Ma swi tiva, nyeleti ya n'walungu leyi fanaka i nyeleti ya ni madyambu na yona, hikuva misava ntsena yi hundzulukile. Kambe ku na nyeleti yin'we leyi nga fambiki, naswona yi vekiwile exikarhi ka misava. Hikokwalaho . . . Hi yona—hi yona nyeleti ya ntiiyiso. Loko u tiva nyeleti ya n'walungu, u nga tshama u ri karhi u kuma ndlela ya wena yo rhendzeleka. Kambe, oho, sweswo hi loko wanuna a lahlekile, naswona a nga swi tivi leswaku i ndlela yihi leyi a nga fambaka hi yona.

³⁸ Sweswi, ndzi tiva Nyeleti. Oho, yi tlula nyeleti ya n'walungu. Naswona ku bohiwa na ku vona Vukona bya Yena, swi nga ri na mhaka leswaku u lahlekise ku yini kumbe leswaku u le kwihi, u nga ha kuma ndlela ya wena ya ku tlhelela endzhaku hi vuleteri bya Yena, rero i Rito ra Yena. I ndlela yo huma emakhombyeni hinkwawo. I ndlela ya ku ya eku rhulen. I ndlela ya ku ya eku humeleni. I ndlela ya ku ya eVuton'wini, hi byoxe, i ku landzela Nyeleti leyi, Hosi Yesu. Kutani sweswi, loko u bohiwile

eka Nyeleti yaleyo, Moya lowo Kwetsima i Xikomba-ndzhawu lexi nga kombetela eka Nyeleti liya ntsena. Lowo Kwetsima . . .

³⁹ Xikomba-ndzhawu, xi imaginetiwile eka pala liya ya le n'walungu. Nakona ndlela yin'we ntsena, swi nga ri na mhaka leswaku u le khwatini ro tanahi kwihi, kumbe leswaku swihlahla leswi swi nga ku rhendzelwa swi tlhume ku fika kwihi, kumbe leswaku elwandle ku na nkungwa ku fika kwihi, voko leriya ra xikomba-ndzhawu, u nga ri hundzuluxa hi ndlela yihi na yihi leyi u yi lavaka, naswona ri ta dewula ri vuyela endzaku kutani ri kombetela eka nyeleti ya n'walungu.

⁴⁰ Nakona loko hi ri ekhombyeni, nakona hi ri karhi hi tshembhela eka Kreste, ku na nchumu wun'we lowu nga ntiyiso: Moya lowo Kwetsima wu ta hi kombetela eRitweni leri nga ta hi letela ku ya eka Nyeleti ya N'walungu, na ku hi ntshuxela xin'wana na xin'wana lexi hi xi lavaka. Hi yena ku Hetiseka ka hina.

⁴¹ Eka wanuna la lahlekeke enhoveni, xikomba-ndzhawu i xilo lexi xi n'wi letelaka ku ya ehandle. Loko hi ri ekhombyeni, ku na xilo xin'we ntsena; xi na ntiyiso ntsena tanahi nyeleti ya n'walungu. Ntsena loko misava yi yima eka xiyimo xa yona, na ku hundzuluka hi ku rhendzeleka, nyeleti ya n'walungu yi ta tshama eka ndzhawu ya yona.

⁴² Nakona ntsena loko ku ri na hilaha ku nga Heriki, Kreste u ta tshama a ri Muponisi, na ndlela ya ku huma hi yona eka xiphigo xin'wana na xin'wana, ku hambana kun'wana na kun'wana, ndzingo wun'wana na wun'wana, na swin'wana na swin'wana. Hikokwalaho hina—hina, loko hi bohiwile eka Yena, a hi pfilunganyeki na ku karhateka kukotisa hilaha misava yi endlaka hakona, "Nakona, oho, xana hi ta endla yini hi mayelana na *leswi*—*ke*? Xana hi ta endla yini hi mayelana na *sweswo*—*ke*?" Hi tikomba ingaku a hi kalanga hi khweketiwa. Kambe wanuna la nga khweketa moya-xiviri wa yena eka Kreste Yesu, ku tshembha ka yena kwalahaya, hi ku swi tiva leswaku loko a kombela Tatana xin'wana na xin'wana hi Vito ra Yena, "Yesu u te, 'Ndzi ta swi endla.'" Sweswo swa swi tshamisekisa.

⁴³ Sweswo—sweswo swa swi tshamisekisa. Hi swona amen. Hi swona ku hetiseka. Hi swona makumu. Loko Yesu a te, "Kombelani xin'wana na xin'wana eka Tatana hi Vito ra Mina, Ndzi ta swi nyiketa." Sweswi, sweswo i makumu. Hi swona sweswo. "Xin'wana na xin'wana lexi mi xi lavaka, loko mi khongela, pfumelani leswaku ma swi amukela, mi ta swi kuma." Sweswo swa swi tshamisekisa. Sweswo hi hinkwaswo ka swona, wa vona, loko hakunene hi khweketiwile na ku va hi Swi pfumela, na loko hi N'wi endlile ku Hetiseka ka hina. Hikuva, Wa swi endla. Hi yena ku Hetiseka loku ku hi tekaka ku suka eka ku chava hinkwako. Ku hava ku chava loko hakunene u bohiwile eka Ribye ra Tinguva.

⁴⁴ Ku hava ku chava eka mutluti, hilaha xikepe xi biwaka hi magandlati hi ku nonohwa hakona, ntsena loko khokholo leriya ra ha khomelerile ehenhla ka ntshava lahaya. Hikokwalaho ka yini, i ntiyiso. Wa swi tiva leswaku xikepe xi ya tshama ehenhla. A xi yi eku lwisaneni na ribye rin'wana kun'wana. A xi yi eku nghenen i eka mati yan'wana lawa nga entangiki kutani xi penyuluka, hikuva xi na ku hetiseka loku ku khweketiweke ehenhla ka ntshava yin'wana.

⁴⁵ Nakona loko wanuna a nga khongela xikhongelo xa ripfumelo, naswona a khweketa moyaxiviri wa yena lahaya eRitweni ra Xikwembu, laha, "hinkwawo matilo na misava swi nga ta hundza, kambe Rito rero ri nga ka ri nga hundzi," ku hava ku chava. Va tshireva ta, va vula swin'wana na swin'wana leswi va swi lavaka. Ripfumelo ra hina ri le ka Xikwembu, Xikwembu ntsena. Ha swi pfumela.

⁴⁶ Ku vile na nkarhi lowu matikhomele ya le tafuleni ya tiko leri a ya wisile eritweni ra wansati. Ndzi pfumela leswaku vito ra yena a ri vitaniwa Emily Post. Sweswi, a ri ku hetiseka eka matikhomele ya le tafuleni. Loko Emily Post a lo vula leswaku, "Teka kutani u dya tinyawa ta wena hi mukwana wa wena," sweswo a swi ri swona. Sweswo a swi ri swona, hikuva a ri ku hetiseka eka matikhomele ya le tafuleni. Loko a lo vula leswaku, "Nwana kofi ya wena esosareni ya wena, nakona u yi khula tanihi laha a wu endla hakona," swi nga ri na mhaka leswaku swi twala swi ri na futa njhani, a swi tama swa ha ri ku hetiseka. Munhu un'wana na un'wana u swi khinsamerile hikuva va n'wi tekile tanihi loko a ri ku hetiseka ka matikhomele ya le tafuleni.

⁴⁷ Hi fanele ku va na ku hetiseka swi nga ri na mhaka leswaku hi le ku endleni ka yini. Loko ku ri leswaku hi ta pfuka hi kumile xin'wana na xin'wana, hi ta fanele ku va na ku hetiseka.

⁴⁸ Ku vile na nkarhi laha rito ra Hitler a ri ri ku hetiseka eJarimani. Swi nga ri na mhaka leswaku munhu un'wana u ri yini, rito ra Hitler a ri ri ku hetiseka. Loko a te, "Va fa," va fa. Loko a te, "Va hanya," va hanya. Nakona loko a te, "Hi ya enyimpini," kumbe, "A hi yi enyimpini," swin'wana na swin'wana leswi hi swi endlaka, rito ra yena a ri ri ku hetiseka.

⁴⁹ Ku vile na nkarhi lowu Italy a yi ri na ku hetiseka. Rero a ku ri rito ra mulawuri wa vona, Mussolini, leswi a vula leswaku va swi endla. Va vula leswaku muchayeri wakwe u chayerile a ya kwalahaya, a hatlisile hi minete yin'we, ku ya n'wi kuma. U n'wi baleserile. Hikokwalaho ka yini? U te, "A ndzi ku lavi lahawani u hatlisa hi minete yin'we. Ndzi ku lava lahawani eka thonsi, hi nkarhi lowu nga wona." Wa vona? Rito ra yena a ri ri ku hetiseka. Italy hinkwayo a yi khinsamela swona.

⁵⁰ Ku vile na nkarhi lowu Faro, eEgipta, a ri ku hetiseka. Kambe wa swi vona . . .

⁵¹ Kambe hinkwaswo swiboho leswi va nga swi endla a swi ri xiboho lexi endliweke hi munhu, nakona hinkwavo va wile. Hikokwalaho ka yini? Hikuva a va nga ri hi ku ya hi ximunhu... A xi nga ri hi ku ya hi Rito ra Xikwembu eka vutomi bya ximunhu. Ndzi lava sweswo, ndza tshembha, ku swi khwekela. Loko hi langutela ku ponisa vutomi bya ximunhu, hi fanele ku ta hi ku ya hi Rito ra Xikwembu na kungu ra Xikwembu eka vutomi bya ximunhu. Nakona ndlela yin'we ntsena leyi u nga ta kuma leswi hi yona, i ku swi kuma eRitweni ra Xona, na ku swi pfumela, sweswi.

⁵² Swingaleswi, vona Vafaro. A ndzi ri eEgipta ku nga ri khale ngopfu, nakona ndzi ehleketa leswaku a va fanele ku cela makumembirhi wa magoza ku ya ehansi ka misava, ku ya kuma ndzha—ndzawu laha Faro a tshamile kona tani hi hosi ya misava.

⁵³ Na Vaheroda lavakulu, na van'wana na van'wana, ku hundzela ehansi hi ntila, ha ku vona laha mimfumo ya vona yi nga wa na ku ya kona.

⁵⁴ Kambe ku na Mfumo wun'we lowu nga ehenhla ka mimfumo hinkwayo. Wu le henhla-henhla ematilweni ku fikela laha wu nga ta ka wu nga hundzi. Nakona Kwalahaya ku tshamile Hosi, leyi, loko Yi endla xiboho xa Yona eka xin'wana na xin'wana, kutani hi pfumela xiboho xexo, xexo i ku hetiseka. Xi ta va hi ndlela yaleyo swi nga ri na mhaka leswaku mani na mani u ri yini hi mayelana na swona. Swi tano minkarhi hinkwayo.

⁵⁵ Sweswi, Huvonkulu ya hina. Huvonkulu ya hina, hi yona—yona ku hetiseka, makumu ya mintengo hinkwayo. Sweswi, hi fanele ku va na yona. Nkarhi wun'wana hi nga va hi nga pfumelelani na xiboho xa yona. Kukotisa hilaha, va nga pfumelelangiki na ya Hitler, na van'wana na van'wana. Kambe hambiswiritano hi fanele ku va na ku hetiseka loku. Nakona ku hetiseka ka tiko na mintengo i Huvonkulu. Tihuvo ta le kusuhi na hina ti nga ha va xin'wana na xin'wana na ku vula *leswi*, kambe Huvonkulu yi fuma ehenhla ka tona hinkwato. Hi fanele ku va na yona. Tanihi tiko, hi fanele ku va na xiboho xa yona, hikuva tiko ri bohiwa ku va na ku hetiseka ka Huvonkulu. Hi swona.

Xin'wana na xin'wana xi fanele ku va na ku hetiseka.

⁵⁶ Xana a wu swi tiva leswaku ntlangu wa ntoloveloo wa bolo wu fanele ku va na ku hetiseka-ke? Ina. Xana i yini ku hetiseka ka ntlangu wa bolo-ke? Amphaya. Xana swi nga va njhani loko ku ri hava amphaya, wa vona, amphaya? Swi nga ri na mhaka leswaku a wu yimile kwihi, leswaku i ndzhawu yihi leyi u swi langutaka u ri kona kutani u ku, "A ku ri bolo," nakona yona yi te, "A ku ri ku ba," kunene, sweswo hi leswi a yi ri swona, a ku ri ku ba. Hikokwalaho ka yini? Hikuva, rito ra yona, swi nga ri na mhaka leswaku vaseketeri va ri yini, leswi munhu un'wana a nga swi vula. I ku ba hikuva yi swi vitanile ku ba, naswona

hi yona amphaya. Sweswi, a swi ta va njhani loko a ku ri hava amphaya? A ku ta va na huwa, na hinkwaswo eka mpfilumpfilu, kukondza u nga ha vi na ntlangu wa bolo. Hikokwalaho, u fanele ku va na ku hetiseka, ku va na ntlangu wa bolo. Swi fanele ku va hi ndlela yaleyo.

⁵⁷ Sweswi, ku fanele ku va na ku hetiseka, eka rivoni ra le magondzweni. Rivoni ra le magondzweni i ku hetiseka, swa antswa, emagondzweni. Xana a swi ta va njhani loko a ku ri hava rivoni ra le magondzweni-ke? Kumbe xana a swi ta va njhani loko rivoni ra le magondzweni a ri nga tirhi, kutani u tsutsuma ku rhelela hi xitarata-ke? Kutani nakulorhi un'wana a ri karhi a ta hi ndlela *leyi*, nakona a ku, "Sweswi, ndzi rhange ndzi fika. Ndzi fanele ku hundza lahaya." Kutani a ku, "Ndzi letile entirhwени." Ku vulavula hi ntlimbo wa le magondzweni, hakunene a wu ta va na wona. Kambe, wa vona, rivoni ra le magondzweni ra swi tshamisekisa. Hi rona ku hetiseka. Loko rivoni ri ri rihlaza, famba. Loko ri tshwukile, yima. Loko ku nga ri na nchumu wo tanahi ri—rivoni ra le magondzweni, kutani ku va na mintlimbo ya le magondzweni.

⁵⁸ Nakona sweswo hi swona leswi nga xiphigo eka ripfumelo ra Vukreste namuntlha. Hi na mintlimbo yo tala ngopfu ya le magondzweni, munhu un'wana na un'wana u le ku endleni ka ku hetiseka ka yena n'winyi.

⁵⁹ Loko, hi na ku Hetiseka kun'we, nakona kwaloko i Rito ra Xikwembu lexi hanyaka. Sweswo swi swi tshamisekisa hi masiku, swi nga ri na mhaka leswaku mani na mani u ri yini.

⁶⁰ Swi lava ku fika eka ndzhawu leyi kotisaka leswi a swi ri xiswona hi masiku ya Vaavanyisi, munhu un'wana na un'wana u na ku hetiseka ka yena n'winyi. Kambe hinkwaswo swa tsandzeka, kukotisa Vafaro na van'wana na van'wana.

⁶¹ Kambe ku hetiseka ka Xikwembu i Rito ra Xona. Xa ri nyiketa, "Nakona matilo na misava swi ta hundza, kambe Ri nga ka ri nga hundzi." Ndza swi tsakela sweswo.

⁶² Sweswi, a hi na nkarhi wo tala, swingaleswi ntsena a hi languteni swa swinkadyana eka vanhu vantsongo lava nga nghena ekhombyeni, na le ka minkarhi yo tala laha rifu a ri ri ekusuhi, kukotisa hilaha hi nga yima hakona vusiku lebyi, nakona va tekile ku hetiseka. A hi konaniseni van'wana va vona.

⁶³ A hi tlheleleni endzhaku eka xitori lexi nga tolloveleka eka hina hinkwerhu, eka masiku lawaya xidyoho a xi andzile emisaveni kukondza Xikwembu xi karhateka na ku karhala hi xona, nakona misava a yi ya eku herisiweni. Kutani Xikwembu xi nyikile Nowa ku hetiseka, loku a ku ri Rito ra Xona. Nakona, a swi khathaleki, ku hetiseka lokuya a ku ri ka ku ponisiwa ka vanhu. Nowa a swi tiva leswaku misava a yi ya eku feni. Nakona Xikwembu xi n'wi nyikile ku hetiseka, nakona sweswo a ku ri Rito ra Xona, sweswi, ku ta ponisa vanhu va Xona eka

rifu. Sweswi, xana ku hetiseka a ku ri yini, loku a ku ta ponisa vanhu eka rifu hi nkarhi wa Nowa-ke? A ku ri Rito ra Xikwembu. Sweswo a ku ri ku hetiseka, swi nga ri na mhaka leswaku munhu un'wana u te yini.

⁶⁴ Leswi sayense yi nga swi vula, “Ku hava mpfula le henhla. Hi nga ha balesela n’weti hi switirhiswa swa hina. Ku hava mpfula lahay. Xana mpfula yi ta na njhani ehansi-ke?” Loko Xikwembu xi virule leswaku ku ta na mpfula, Xikwembu xi nga yi veka mpfula exibakabakeni, loko ku ri leswaku Xi vule tano.

⁶⁵ Nowa u yile emahlweni na bindzu ra yena, a wisile, na ku lulamisa ngalava ya ku ponisiwa ka vanhu. Hikuva, a ku ri na ku hetiseka loko nga nyikiwa eka vanhu, leswaku va ta ponisiwa loko va tekile ndlela leyi nga nyikiwa hi Xikwembu eka ku hetiseka loko.

⁶⁶ Swingaleswi, endzhaku, minkarhi yin’wana, loko hi amukerile ku hetiseka... Ndzi nga tsakela ku vula leswi hikwalaho ka vatswari va vana lava, swa leswi ndzi lavaka ku ku byela swona swa xinkadyana. Sweswi, loko...

⁶⁷ Minkarhi yin’wana, loko hi swi amukerile, hi vekiwa endzingweni, ku ta vona loko hakunene hi Swi pfumela. Hi—hi... Xikwembu hi ntoloveloxi endla sweswo. Naswona Xikwembu xi tirha...

⁶⁸ Xi nga ka xi nga cinci nonganoko wa Xona, hikuva Rito ra Xona hi Xona n’winyi. “Eku sunguleni a ku ri na Rito, naswona Rito a ri ri na Xikwembu, kutani Rito a ku ri Xikwembu. Kutani Rito ri endliwile nyama kutani ri tshama exikarhi ka hina. La fanaka tolo, namuntlha, na hi masiku.” Swingaleswi, i Xikwembu minkarhi hinkwayo.

⁶⁹ Loko Xi vitaniwile eka xiendlakalo, ku ta endla, na xiboho lexi Xi xi endlaka, Xi fanele ku tshama na xiboho xexo. Xi nga ka xi nga xi cinci, hikuva Xi hilaha ku nga heriki.

⁷⁰ Sweswi, ndzi nga ha cinca xiboho xa mina, u nga swi endla, hikuva hina hi lava va helaka. Hikokwalaho, hi endla swihoxo.

⁷¹ Kambe Xikwembu xi nga ka xi nga xi cinci xiboho xa Xona, hikuva Xi hilaha ku nga heriki, naswona xiboho xa Xona—xa Xona xi hetisekile, minkarhi hinkwayo. Xi nga ka xi nga vuli laswaku, “A ndzi hoxisile *lahawani*, nakona Ndzi ta cinca xiboho xa Mina,” hikuva sweswo swi nga kombisa leswaku Xikwembu xi nga cinca. Nakona Xikwembu xi nga ka xi nga cinci, na hambi ku ri Rito ra Xona ri nga ka ri nga cinci. Hi lexi xi fanaka, minkarhi hinkwayo.

⁷² Swingaleswi, Xikwembu xi nyikile Nowa ndzingo, endzhaku ka ku amukela ku hetiseka ka Xona. Nowa u nghenile engalaveni. Xikwembu xi pfarile rivanti endlakaloka yena. A swi kanakanisi leswaku va te, “Sweswi, ni mixo, ku ta va na mapapa yo ntima. Naswona ku ta va na ku dzindza na rihat,

naswona mpfula yi ta na.” Kambe, ma swi tiva, hi siku leri landzelaka, dyambu ri humile ntsena hi ku hatima tanihi laha ri nga tshama ri endla hakona.

⁷³ Ndza swi anakanya, vapfumeri va le ndzilekanweni va te, “Hi ta ya ehenhla. Mukhalabya a nga va a lulamile hi mayelana na leswiya. Swingaleswi, kumbexana sayense a yi hoxekile, leswaku ku—ku nga va na mpfulanyana le henhla.” Kambe, tsundzukani, a yi nga si tshama yi na.

⁷⁴ Kambe, manuku, hi siku leri landzelaka, dyambu a ri vangama tanihi laha a ri tshamisa xiswona; ra vunharhu, ra vumune, ra vunthalanu, vuntsevu, na hambi ku ri siku ra vunkombo. Kambe Nowa a khandziyile ekamareni ya le xithezini, leswaku a ta kota ku hlalela swibakabaka. Kutani hi mixo luwa wa vunkombo, loko ku ta ta nkarhi, loko vanhu va ale ndlela leyi hetisekeka ya Xikwembu ya ku ponisiwa, ya ku ponisiwa ka vutomi bya vanhu, timpula ti sungula ku na kutani tiphayiphi ta nkululu ti tatiwa. Kutani xi—xikwekwetsu xi sungule ku tlakuka, nakona xi tekerile Nowa na vona eku hlayisekeni. Hakunene, hikuva a va tshembhela eka Rito ra Xikwembu, ku hetiseka, Rito ra Xikwembu ra xitshembhiso.

⁷⁵ Swi nga ri na mhaka leswaku swi languteka swi bihile ku fana na yini, na hilaha ku dzwihalaka hakona, tama u ri karhi u pfumela ku hetiseka ka wena.

⁷⁶ Muxé, hikokwalaho ka yini, yena, u ringetile ku ponisa vutomi bya Vaheveru lavaya va swisiwana. Nakona a va ri ekusuhi na ku ka va nga ri kahle, kumbe ntsena ku ka va nga ri kahle, tanihi vana lavambirhi lava hi nga eku ringetenka ka ku va ponisa vusiku lebyi. A va ri mahlonga, naswona a va va dlaya ntsena swi nga kunguhatiwanga, nkarhi wihi na wihi lowu a va lava ku swi endla. Nakona Muxé u swi twile embilwini ya yena leswaku leswiya a ku nga ri ku—ku rhandza ka Xikwembu. Swingaleswi, u—u ringetile ku swi endla hi dyondzo. U ringetile ku swi endla hi matshalatshala ya yena n'winyi, kutani u kumile leswaku u tsandzekile hi ndlela yo vava. U endlile swin'wana hi yexe leswi a swi nga lulamanga, hikuva u tekile vutomi bya wanuna un'wana. Nakona sweswo a swi nga lulamanga.

⁷⁷ Kutani, u yile emananga nakona u vile kwalahaya ku ringana makumemune wa malembe. Kambe, siku rin'wana, a ri karhi a risa tinyimpfu ethelweni ra le ndzhaku ka mananga, nakona a ku ri na Rivoni exihlahleni. Kuteloko Muxé a fika ekusuhi na Rivoni leri, Rito ra Xikwembu ri vulavula na yena ku suka eka Langavi ra Ndzilo leri a ri tshamile endzhaku eka xihlahla lexi, kutani ri ku, “Muxé. Muxé.”

Kutani yena a ku, “Hi mina loyi, Hosi.”

⁷⁸ Kutani Yi ku, “Hluvula tintanghu ta wena, hikuva misava ley i yimeke ehenhla ka yona ya kwetsima. Ndzi ku twile ku konya ka vanhu va Mina. Ndzi yi twile nhlengeletano ya

vona ya xikhongelo. Ndzi swi tsundzukile leswaku Ndzi va endlerile xitsembhiso.” Mina, loko sweswo swi nga fanelanga ku lumeka ndzilo etimbilwini ta vapfumeri va Vakreste vusiku lebyi! “Hi mina Xikwembu. Ndza swi tsundzuka leswaku Ndzi swi tshembhisile.” Hilaha Rito leriya a ri ri ra Xitsalwa hakona! Nakona Xi te, “Muxe, Ndzi ku rhuma le hansi ku va u ya va ntshuxa.” Kutani Muxe...

⁷⁹ Hakunene, tanahi laha ndzi swi vuleke eku sunguleni, loko u teka ku hetiseka lokuya ka Xikwembu, ku endla leswaku u endla swilo leswi, kunene, minkarhi yin’wana swi hlekisaka, ematihlweni ya vanhu. Xana u nga swi anakanya, wanuna la nga tsutsuma Vaegipta, hi mixo lowu landzelaka, endzhaku ka ku vona ku hetiseka loku...

⁸⁰ Rito leri ra Xikwembu ri vulavurile na yena hi vumbhoni lebyinene, hikuva a ri ri Rito. Xitsembhiso a xi ri kwalahaya, naswona ku tiyisisa ka Xikwembu lexikulu xa vutumbuluxi, hilaha Xi nga endla hlori e—evukoneni bya Muxe, na ku swi kombisa leswaku a Xi ri Xikwembu xa vutumbuluxi.

⁸¹ Kutani Muxe, hi mixo lowu landzelaka, u tekile nsati wa yena kutani a n’wi tshamisa ehenhla ka meyila, na xi—xihlangi enyongeni ya yena. Kutani loyi wa makumenhungu wa malembe hi vukhale, malevhу ya ri karhi ya lengalenga ku ya exisutini xa yena, nhloko ya yena ya mpandlha yi ri karhi yi hatima, na nhonga ya yena yo gombonyoka evokweni ra yena, a ri karhi a rhelela ku kongoma eEgipta, a ri karhi a huwelela hi ku nonohwa hilaha a kota ku famba hakona.

“Xana u ya kwihi, Muxe?”

“Ndzi rhelela eEgipta, ku ya ri vutla.”

“Ku ya ri vutla?”

⁸² Vuvutla tiko bya munhu un’we! Hikokwalaho ka yini? A ri na ku hetiseka. A ri na nchumu wun’wana. A ri na Rito ra Xikwembu, leri a ta yima eka rona. Wununa wa makumenhungu wa malembe hi vukhale, na meyila, na nhonga evokweni ra yena. Sweswo swi hinkwaswo leswi a ri na swona. Kukotisa vuvutli bya munhu un’we eka Russia, namuntlha. Kambe u rhelerile a ya ri vutla, hikuva a ri na ku hetiseka. A vulavurile na Xikwembu. A twile Rito ra Xikwembu. Nakona a... Nchumu wa kona a ku ri leswaku, u swi endlile. Swi lulamile. Hikokwalaho ka yini? Sweswo a swi ri na yena masiku hinkwawo ya vutomi bya yena. A ku ri ku hetiseka.

⁸³ Ku hava wanuna la nga ni mfanelo ya ku khandziya eka phuluphitи, ku ya chumayela Evhangeli, ehandle ka ku va yena hi yexe a kandziyerile esaveni leriya ro kwetsima, laha loyi a nga pfumeriki leswaku Xikwembu xi kona kumbe la nga pfumeriki a nga hlamuselaka ku ya ekule na leswi nga ehenhla ka ntumbuluko wa Xikwembu. Yesu a nga ta va pfumelela vadyondzisiwa va Yena va chumayela, swi nga ri na mhaka

leswaku a va N'wi tiva ku antswa njhani; va fanele ku ya edorobeni ra Yerusalem, kwalahaya va rindzela kukondza va tatiwa hi matimba lawa ya humaka eHenhla. Va fanele ku va na ntokoto.

⁸⁴ Muxe, hi ku swi tiva leswaku a ri muprofeta, u swi tivile leswaku u kuriseriwe xikongomelo lexi, kambe ehandle ka yutihlanganisi lokuya ka vuwexe, ku Hetiseka lokuya, xin'wana lexi nga swi khorwisa eka yena leswaku loko a rhelerile lahaya, a ya va na ku ntshuxiwa ka vanhu lava. A nga ha pfukanga a ri la fanaka. U rhelerile lahaya hikuva a ri na ku hetiseka, naswona u swi endlile hi ku kongoma leswi Xikwembu xi nga n'wi byela ku va a swi endla. A ku nga ri na ku chava embilwini ya yena, loko a ta hoxa tinyoka ehansi, kumbe tinhonga, nakona ti hundzukile nyoka. Nakona vaencenyeti va xinyama va tile na muxaka wa ministri wa vona, kutani va hoxa ehansi na ku endla nchumu lowu fanaka. Muxe u swi endlile hi ku kongoma leswi Xikwembu xi nga n'wi byela ku va a swi endla. Ku hava nchumu xo xi endla eka yena ehandle ko yima a nga tshukunyuki kutani a vona ku kwetsima ka Xikwembu. Kutani hi kuma leswaku Xikwembu xi tekile nyoka ya yena kutani yi dya letin'wana hinkwato. Yaleylo i ndlela leyi swi endlisiwaka xiswona. A ri na ntiyiso leswaku Xikwembu lexi a xi kota ku n'wi byela ku endla leswi, a xi swi kota ku n'wi khathalela eka xiyimo xo biha.

⁸⁵ Xana hi nga ka hi nga swi endli vusiku lebyi, ehenhla ka tshaku ra jaha leriya ri nyiketaka mbilu ya rona eka Kreste, ku va hi yima ehenhla ka ku hetiseka loku, leswaku Xikwembu xi nga endla leswi nga kotekiki swi va leswi kotekaka-ke? Xi nga cinca timbilu ta vaavanyisi. Hikokwalaho ka yini hi tlula hi ku pflunganyeka swonghasi, hi mayelana na swilo swin'wana-ke? A hi tekeni Xikwembu, ku sungula. Swi vuyiseleni eka xitshebbhiso. Xikwembu xi swi tshebbhisile, leswaku—leswaku Xi ta swi endla.

⁸⁶ Swingaleswi, tsundzukani, Muxe minkarhi hinkwayo a ri munhu la hambaneke hikuva u tekile Rito ra Xikwembu kutani a Ri pfumela. Nakona a ri na xitshebbhiso lexi tiyisiweke eka yena.

Xana i vangani lava a hi ta va vitana-ke? A hi na nkarhi.

⁸⁷ Eku tsaleni ka noti, namuntlha, a ndzi ri karhi ndzi tsala lahwani hi Daniel, hilaha a swi ri hakona. Leswi a swi ri swona, a ku ri nxupulo wa rifu eka yena ku va—ku va a khongela xikwembu xin'wana na xin'wana. Kambe u vile na ku tihlanganisa na Xikwembu, naswona a swi tiva leswaku Xikwembu a xi swi kota ku n'wi khathalela.

⁸⁸ Vana va Vaheveru, a va ta hoxiwa kheleni ra ndzilo naswona a va ta hisiwa hi ku hisa lokuya, ku hisa hi ka nkombo ku tlula hilaha khele ra ndzilo ri nga tshama ri va hakona. Vana lava va Vaheveru a va pfumela Xikwembu. Va te, "Xikwembu xa hina xa

swi kota ku hi ntshuxa eka khele leri ra ndzilo.” Hikokwalaho ka yini? A va ri na ku hetiseka. A va ri na Rito ra Xikwembu.

⁸⁹ Nakona Xikwembu lexi a xi ta kota ku ntshuxa vana va Vaheveru ku suka exitokisini xa rifu xa khele ra ndzilo, swi ngava njhani loko Xi nga ntshuxa xifanyetana lexi xa Muyuda ku huma lahwani, la etteleke lahaya exitokisini xa rifu-ke? Swi ngava njhani loko Xona... Nakona Xi tama xa ha ri Yehovha Xikwembu lexi fanaka lexi a Xi ri xona minkarhi hinkwayo. Hina, kukotisa muapostola Paul, hi nga swi lemuka leswaku Xikwembu lexiya xi fanaka xa hanya namunlhha, “Tolo, namunlhha, na hi masiku hilaha ku fanaka.” Kutani, Vakreste va nga khomelela eka voko ra Xikwembu leri nga cinciki, kutani va cinca xiyimo hinkwaxo. Xikhongelo xa swi cinca swilo. Sweswo hi leswi hi lavaka ku swi endla.

⁹⁰ Xana hi nga swi vula njhani mayelana na Yoxuwa-ke? Xana u ta wu tsemakanyisa ku yini Yordani-ke? Swi tikomba ingaku Xikwembu a xi munhu wa nyimpi la nga tollovelekangiki, kwala eka n'hweti ya Dzivamusoko, loko mati ya ri ehenhla kukotisa leswiya. Kambe Xi byerile Yoxuwa leswaku, “Teka areka kutani u ya emahlweni.” Sweswo swi hinkwaswo leswi a fanele ku swi endla. Nakona Xikwembu xi tlhentlhisericile Yordani endzhaku na ku endla misava yo oma, kutani va fambile hi ku tsemakanya naswona va ntshuxiwile. Hilaha a swi ri hakona!

⁹¹ A swi hlamarisi ku va Yoxuwa a te, “Loko ku ri mina na yindlu ya mina, hi ta tirhela Hosi.”

⁹² Hilaha Davhida, mupatriyaka luya lonkulu, hilaha a hi ta tsakela ku vulavula hi mayelana na yena. A hi na nkarhi. Kambe, naswona minkarhi yo tala... Tanihi laha hi nga twa un'wana a ri karhi a vulavula eka swinkadyana leswi nga hundza hi mayelana na Davhida na xidyoho xa yena, kambe loko hinkwaxo ka xona xi rivaleriwile. Loko a ri karhi a ya enyimpini, nakona hi swi vitana leswaku, emisaveni, “Xiyimo a xi bihile,” naswona mulwisani a ri lonkulu. Kutani Davhida u tshamile lahaya ehansi ka nsinya, kutani a juluka, kukondza a twa mpfumawulo wu ri karhi wu hundza eswihlahleni swa murhobeyila, manuku a swi hambanile. Davhida u pfukile kutani a ya emahlweni, hikuva a ri na ku hetiseka, laha a swi tiva leswaku lexiya a ku ri Xikwembu xi fambaka emahlweni ka yena.

⁹³ Xana hi nga ka hi nga xi khongeli xikhongelo xa ripfumelo lexi nga rhumelaka Xikwembu eka bodo ya parula ehansi lahaya-ke? Hakunene, hi nga swi endla. Ha swi pfumela leswaku hi nga swi endla, loko hi nga khomelela eka ku hetiseka kwaloko.

⁹⁴ “Hilaha Abraham a vitanek swilo, leswi a swi nga ri kona, tanahi loko swi ri kona,” hikuva a ri na xitshebbiso lexi hetisekeke ku suka eka Xikwembu, leswaku Xikwembu a xi ya eku n'wi nyikeni ka wa yena... ku n'wi nyika n'wana hi Sarah.

Kuteloko a ri na dzana ra malembe hi vukhale, kumbe wanuna a ri tano, nakona yena a ri na makumenkaye, "U tamile a nga dadeleki eka xitshembhiso xa Xikwembu hi ku kala ripfumelo, kambe u tiyile, a nyika ku dzunisa eka Xikwembu." Nakona hi koxa ku va hi ri vana va Abraham. Loko Abraham . . .

⁹⁵ Loko, hi vile na ku tsariwa ka Bibele ku sukela hi masiku ya Abraham, na timboni hinkwato leti hi nga va na tonna endzhaku, leswaku Yehovha u hlayisa Rito ra Yena, leswaku Kreste i N'wana wa Xikwembu. Hi yena Muhamlanganisi exikarhi ka munhu na Xikwembu, naswona ku hava muhamlanganisi un'wana ehandle ka Yena. Nakona wa tshembhisa, "Loko mi kombela xin'wana na xin'wana eka Tatana hi Vito ra Mina, mi ta nyikiwa xona." Nakona hi koxa ku va hi ri vana va Abraham. Loko, "Abraham u vitanile swilo, leswi a swi ri kona, tanihu loko swi nga ri kona, hikuva a pfumela Xikwembu." Swi hetisekile. Ndzi swi pfumela hi mbilu ya mina hinkwayo.

Vutomi bya Paul lebyi vekaka Kreste exikarhi a byi ri ku hetiseka ka yena. Byi n'wi bohile.

⁹⁶ Kreste a ri ku hetiseka ka ku pfuka eku feni, tanihu laha hi nga swi hlaya lahwani. U te, "Xikwembu xi hlambanyile hi xihlambanyo, eka Davhida, leswaku Xi nge tshiki moyaxiviri wa Yena etiheleni." Xihlambanyo i makumu ya timholovo hinkwato. "Nakona Xi hlambanyile leswaku Xi nge tshiki moyaxiviri wa Yena etiheleni, kambe xi ta N'wi pfuxa." Hikokwalaho A tshembha Xikwembu, naswona u vambiwile; a fa, a tlhela a pfuka, kutani a tlhandlukela eTilweni, hikuva A pfumela Xikwembu.

⁹⁷ Swi ngava njhani, tanihu laha A nga veka xikombiso, laha hina hi nga tekaka ku hetiseka! Loko Kreste a swi tekile, ehenhla ka xitshembhiso lexiya xin'we lahaya; i ko tala ku fika kwini laha hina hi nga swi tekaka, na magidi-gidi ya switshembhiso! Na Ngati ya Yesu Kreste lahaya ku va yi basisa ndlela ya hina, na ku hi tisa ku tsemakanya gova leriya rikulu ra xidyoho lexi nga hi hambanyisa, xa ku kala ripfumelo, ku suka eka Xikwembu, na ku hi tisa kwale Vukoneni bya Xona, ku ta vulavula na Xona, swi ngava njhani swona! Ina. Hi fanele ku va na ku hetiseka.

⁹⁸ Ndzi le ku ehleketeni hi un'wana sweswi, tanihu ku pfala, la nga va ka George Washington, loko Amerika ra ha ri ntsanana nakona a hi ri karhi hi lwela vutomi, vutomi bya tiko lerikulu leri hi nga na rona. George Washington a ri Mukreste. A ri mupfumeri. Naswona ehansi le Valley Forge, ndzi byeriwe leswaku masocha ya Amerika ntsena a ya ri na, kwalomu ka n'we-xa-nharhu wa vona, a va ambarile tintanghu. Naswona xixika a xi titimela, na maxelo ya ziro, naswona nambu a wu tiyile na ku khapa. Naswona Mabirthixi a va ri eka tlhelo lerin'wana. Naswona vutomi bya xitikwana lexi a byi ri xandleni.

⁹⁹ Xana u endlile yini? A ri Mukreste. U yile ehandle hi nkarhi wa ni madyambu kutani a khinsama ehansi eka gamboko, kutani a khongela kukondza a tsakamisa hi mati ya gamboko ehenhla ku rhendzeleka hi xisuti xa yena. Nakona u tshamile kwalahaya na ku khongela kukondza a kuma ku hetiseka, nhlamulo ku suka eka Xikwembu, leswaku Xikwembu a xi ya eku n'wi nyikeni ka ku hlula.

¹⁰⁰ Kutani hi siku leri landzelaka, Valley Forge a yi nga ri nchumu eka yena. U tsemakanyile Delaware, a susumeta ku hundza hi ayisi na masocha lawa a ya ambarile hafu, ya frizile hafu, minkondzo ya wona leyi nga ambalangiki tintanghu yi ri ehansi, eka gamboko. Nakona u yi tekile, loko maqulu manharhu ya xibalesa ya ta hundza eka khancu wa yena. Hikokwalaho ka yini? A tshembhela eka ku hetiseka ka xikhongelo lexi nga hlamuriwa. Amen. Byona vuyimelo bya tiko ra hina byi simekiwile ehenhla ka nchumu wo tano.

¹⁰¹ Xana ku humelerile yini hi vanhu namuntlha lava va koxaka ku va va ri Vakreste-ke? Hikokwalaho ka yini hi pfindlukile eka awara leyi kotsaka leyi-ke? Hi nga pfindluki. A hi veni masocha. Ina, nkulukumba.

¹⁰² U khongerile kukondza a kuma nhlamulo liya. Kutani, a ku na nambu lowu wu nga punyala, a ku na masocha lawa ya nga ambalangiki tintanghu, swi nga ri na mhaka leswaku xiyimo xi njhani, a va ta yi teka hikuva Xikwembu a xi vule tano. Qulu a ri nga ta n'wi dlaya, leri humaka eka xibalesa xa nala. Hakunene. Hikokwalaho ka yini? U vile na nhlengeletano ya xikhongelo. U kumile nhlamulo.

¹⁰³ A swi ri kahle njhani vusiku byin'wana, loko Muapostola Petro a ri ejele, naswona a va ya eku n'wi dlayeni hi mixo lowu landzelaka. A ya eku feni ehansi ka nxupulo wa rifu, tanihi laha Muyuda loyi lontsongo a yaka eku swi endleni sweswi. Kambe xana va endlile yini-ke? Va endlile nchumu lowu fanaka lowu hina lahwani eHouston hi nga eku ringeten i ka ku swi endla. Va vumbile nhlengeletano ya xikhongelo endlwini ya Yohana Marka. Loko va ri eku khongeleni, Ntsumi ya Hosi yi yile ekhotsweni, kutani yi pfula swigogo swa le khotsweni, kutani yi pfula minyangwa. Naswona ku hundza eka sweswo, yi humesile Petro ehandle, kutani a rhelela enhlengeletanweni ya xikhongelo.

¹⁰⁴ Ndza pfumela, vusiku lebyi, leswaku Xikwembu lexi fanaka xa hanya. Loko ku ri leswaku a hi Xona Xikwembu lexi fanaka, manuku ku na swin'wana leswi hoxekeke. Hakunene.

¹⁰⁵ Xana swi endliwile hi yini-ke? Hi nhlengeletano ya xikhongelo, hi Vakreste lava tshembhekeke lava a va pfumela, na ku pfumela leswaku Xikwembu lexiya a xi ta ntshuxa makwenu wa vona ku suka eka nxupulo wa rifu. Vona a va ri Vakreste lava

nga tshama vusiku hinkwabyo na ku badama hi swikandza swa vona, kutani va rila na ku khongela.

¹⁰⁶ Tanihi laha ndzi nga twa un'wana wa vavuli va rito, xinkadyana lexi nga hundza, a ri karhi a vula leswaku a ya eku rilene, vusiku hinkwabyo. Khombo ra kona hi leswaku, namunthla, vanhu va nyumisa. Va karhala, va khomiwa hi vurhongo. A va swi koti hambi ku ri ku tshama eka ntirho wa khume ra timinetse, hi ku nonohwa. Kunene, i—i swilo swin'wana leswi hoxekeke.

¹⁰⁷ Loko u rhandza Xikwembu, kunene, kunene, hi fanele ku gingirika. A swi fanele ku va swi ri mintshembho ya—ya hina, ku navela ka hina. A swi fanele ku va tano. Swin'wana na swin'wana leswi nga eka hina a swi fanele ku va hi rirhandzu ra Kreste. Amen. Hi tshamile hi ku lolohwa. Hi tshamile hi nga ri na ku khumbheka, loko misava yi ri karhi yi fa ehansi ka minkondzo ya hina. Sweswo swi lulamile. Vutomi bya vavanuna byi le ku heleni, va nga ri na Xikwembu, nakona hi tshama swonghasi—swonghasi hi nga ri na ku khumbheka hi swona. Ntsena loko hi nghena kereke, sweswo hi swona hinkwaswo leswi hi ehleketa ka leswaku swi endla ku hambana.

¹⁰⁸ A ndzi ri karhi ndzi vulavula hi ku Vuya ka Kreste, eka mavhiki mantsongo lawa ya nga hundza, ekerekeni yo karhi. Kutani endzhaku lahaya a ku ri na un'wana la nga hlangana na mina endzhaku ka kereke, kutani a ku, “Makwerhu Branham, u va chavisela ro fa vanhu.”

Ndzi ku, “Hikokwalaho ka yini ndzi endla sweswo?”

¹⁰⁹ A ku, “Kunene, u vulavula hi ku Vuya ka Kreste. A ndzi swi lavi ku twa swilo swo tanihi sweswo. Ndzi na xifanyetana lahawani lexi ndzi faneleke ku xi kurisa. Ndzi na nhwanyana exikolweni.”

¹¹⁰ “Oho,” ndzi ku, “ku Vuya ka Kreste i nchumu wo kwetsima ku tlurisa lowu ndzi nga ehleketa ka hi wona.” Hakunene. Wa vona?

¹¹¹ Bibele yi te, “Hinkwavo lava va *rhandzaka* ku humelela ka Yena.” Oho, mina, eka siku leri loko lowu faka wa khale wu nga ta teka lowu nga fiki, naswona yindlu ley—leyi ya ntungu leyi ndzi hanyaka eka yona yi nga ta cinciwa, hi xinkadyana, hi ku copeta ka tihlo, na miri lowu wu kotisaka miri wa Yena N’winyi lowu kwetsimaka! A swi fanele ku va swi ri ku navela ka mbilu ya Kereke. A ku fanele ku va wanuna na wansati un'wana na un'wana, va ri endzilweni, hi ku chumayela eswitaratene na hinkwako-nkwako, ku ringeta ku ponisa mimoya. Hakunene.

¹¹² Ndzi le ku tivutiseni loko hakunene hi bohile eka ku hetiseka lokuya hi koxaka ku va kona. Xana hi langutile eka nyeleti ya ni mixo leyi lulameke—ke? Loko ku ri leswaku ntsena hi le ku tshembheleni eka kereke ya hina na dinominexini ya hina, ku

tihlanganisa ka hina; tanihi leswi misava yi cincaka, yi cinca na sweswo, ku rhendzeleka na ku rhendzeleka.

¹¹³ Kambe ku na Nyeleti yin'we leyi nga cinciki. Ku na xilo xin'we lexi nga ta ka xi nga cinci, xexo i Xikwembu. Xikwembu xi nga ka xi nga cinci. Rito ra Xona ri nga ka ri nga cinci. Bibele ya Xona yi nga ka yi nga cinci. Nakona loko munhu a tswariwile hi Moya wa Xikwembu, na Kreste endzeni ka yena, swi hikahata xitsembhiso xin'wana na xin'wana hi "amen." Sweswo hi swona. Hakunene.

¹¹⁴ Oho, kunene, nhlengeletano ya xikhongelo hi leyi hi yi lavaka. Hi boheka ku va Vakreste. Vakreste hinkwavo va fanele ku tirhisa ku hetiseka loku ku fanaka, Rito ra Xikwembu. Rito ra Xikwembu i xiseketelo xa Mukreste.

¹¹⁵ Yesu u vurile, eRitweni ra Yena leswaku, "Loko mi tshama eka Mina, Marito ya Mina ya tshama eka n'wina, kutani mi nga kombela leswi mi swi lavaka, nakona mi ta endleriwa swona." Ehleketa hi swona. Xana hi swihi swin'wana swa ku hetiseka u nga swi lavaka-ke? Xana hi swihi leswi u nga swi tshembhaka ku tlurisa swin'wana swo kotisa sweswo-ke? "Loko mi tshama eka Mina, Marito ya Mina ya tshama eka n'wina, kutani kombelani leswi mi swi lavaka."

¹¹⁶ Ku kombela Xikwembu ku va xi tirhana na mbilu ya muavanyisi, kumbe bodo liya ya parula, na ku humesela nakulorhi luya lontsongo ehandle ka xitokisi lexiya xa rifu! Loko hi swi kombela hi ripfumelo, hi ri karhi hi pfumela, eka tinhlengeletano leti ta xikhongelo, hi ta swi kuma. Leswaku, ntsena ndzi pfumela Xikwembu kukotisa sweswo.

¹¹⁷ Nakona ripfumelo ra mina leri ndzi nga na rona eka Xikwembu, hikokwalaho ndzi ri lahawani vusiku lebyi. Hikokwalaho ndzi yimisile swin'wanyana, kutani ndzi fika lahawani. Ndzi fanele ku chayela madzana ya timayile vusiku lebyi, ku tlhelela eTucson, Arizona, hikuva ndzi tile ku ta veka ripfumelo ra mina na ra wena. Luya i wanuna. I moyo—xiviri lowu eteleke lahaya. Hi un'wana la nga ni xilaveko. Nakona hina Vakreste hi fanele ku phaphamela eka swa xiviri, eka ripfumelo ra xiviri. Ri bohi eRitweni ra Xikwembu, kutani u kombela xitsembhiso xexo. Ina, nkulukumba. Oho, mina! "Loko mi tshama eka Mina, na Marito ya Mina ya tshama eka n'wina, kombelani leswi mi swi lavaka."

¹¹⁸ Naswona nakambe, "Loko vanhu lava nga vitaniwa hi Vito ra Mina va nga hlengeletana swin'we na ku khongela, kutani Ndzi ta yingisa ku suka eTilweni." Nhlengeletano ya xingongelo, hi swona sweswo.

¹¹⁹ Ndzi pfumela eka ku vulavula na maqgweta na ku vulavula na vayimeri va xinawu, kumbe vaavanyisi, kumbe tibodo ta parula, kumbe van'wana na van'wana vo tala. Sweswo hinkwaswo swi lulamile. Kambe, makwerhu, loko ntshembho wa

wena wu nga bohiwanga eka xin'wana lexi nga miehleketo ya munhu wa xinyama, miehleketo ya vanhu, swa antswa, hakunene u ta khomisiwa tingana.

¹²⁰ Kambe loko u nga boha ripfumelo ra wena eka ndzhawu yo tanihi leyi u yi tivaka, nakona u tshama kwalahaya na ku khongela kukondza Xikwembu xi nhlamula, nakona u swi tiva leswaku u na yona embilwini ya wena, xin'wana xi ya eku humeleleni.

¹²¹ Ndzi vonile vafi va pfuxiwa ku suka ekaya ka nkosi. Ndzi vonile ma—matihlo lawa ya feke ya pfuleka, tindleve leti nga twiki ti pfuriwa. Ndzi vonile timhangu ta mfukuzani, na mfukuzani ya marhambu, nhlokohno, swi horisiwa hi matimba ya Xikwembu xa Matimba hinkwawo. Hikuva, a va ri na ripfumelo ra ku pfumela leswaku Xikwembu lexiya, Lexi nga endla xitshebbhiso, xi nga swi kota ku hlayisa xitshebbhiso xa Xona. Rero i ra xiviri, ripfumelo ra xiviri kukotisa leri Abraham a ri na rona.

¹²² Bohelela kwalano. Tshama kwalano naswona u khongela. Ku nga ri ntsena ku ya ehansi, na leswaku, "Xikwembu, ntshuxa mbuyangwani lontsongo naswona u n'wi rhumela ekaya." Hinkwerhu hi nga swi tsakela sweswo. Kambe a hi tshameni lahaya kukondza swin'wana swi humelela. Oho! Loko swin'wana swi humelerile, kutani, xitiyisekiso lexiya xi nga wela exikarhi ka vanhunyana lava tataka xandla lava nga tshama lahawani eka holo leyi yikulu vusiku lebyi, ku nga wela exikarhi ka hina lahawani, ripfumelo na matimba lawa ya eneleke ya Xikwembu, loko hi nga khongela, kukondza hi ba ntila luwa wa le kaya, kukondza ku hetiseka lokuya ku xikelahanshi, Langavi ra Ndzilo leriya ri fanaka leri tekiweke kwala eHouston, hi xiteka-swifaniso xa Ted Kipperman, khumembirhi wa malembe lawa ya nga hundza. U kona vusiku lebyi, ntsena ku kula hilaha A ri hakona nkarhi luwa, ku ta ntshuxa mufana luya, loko ntsena hi nga swi pfumela, hikuva Hi la fanaka tolo, namuntlha, na hi masiku. Ndzi swi pfumela hi mbilu ya mina hinkwayo. Hikokwalaho ndzi ri kona ku ta nyikela xikhongelo xa mina na n'wina hinkwenu leswaku Xikwembu xi ta tsetselela vutomi bya bona.

¹²³ Kutani loko mi nga khongela, kukondza mi kuma nhlamulo endzhaku, mi kuma xitiyisekiso endzhaku, kukotisa hilaha Washington a xi kuma hakona, kukotisa hilaha Yohana Marka a nga xi kuma hakona, kukotisa hilaha Daniel a nga xi kuma hakona, kukotisa hilaha Muxe a nga xi kuma hakona, kukondza mi kuma ku hetiseka, swin'wana leswi mi swi tivaka leswaku mi nga khweketa eka swona, manuku, "Ehenhla ka ku hetiseka loku Ndzi ta aka Kereke ya Mina," nakona tihuvo hinkwato etikweni ti nga ka ti nga swi ali Sweswo. Sweswo swi lulamile. Ehenhla ka Sweswo!

¹²⁴ Xona Xikwembu lexi a xi ta teka Muyuda lontsongo wa nhompu yo oveka kukotisa Paul, la hlundzukile na ku va a ri karhi a rhelela kwalahaya ku ya veka Vakreste hinkwavo ehansi ka nxupulo wa rifu, nakona a xi ta kota ku n'wi cinca xi n'wi endla Mukreste la rhandzekaka, leswaku Xikwembu lexiya xi fanaka xa hanya vusiku lebyi, xi nga cinca nawu wu ya eka tintswalo, nkarhi wun'wana na wun'wana lowu Xi tekaka mavonele ya ku swi endla. Haleluya! U ya eku ndzi vitaneni ka muvumbuluki wo kwetsima, hambiswiritano, swingaleswi na mina ndzi nga ha sungulana na swona sweswi. Ndzi pfumela Xikwembu xexo. Amen. Ina, nkulukumba.

¹²⁵ Kutani Marka 11:22, loko mi hetile ku khongela. U te, “Ndzi tiyisile, ndzi tiyisile, Ndzi ri eka n'wina, vanani na ripfumelo eka Xikwembu. Ndzi ri eka n'wina, loko mi nga ku eka ntshava ley, ‘Suka.’” Loko ku hetiseka lokuya ku tile eka wena, loko u totiwile hi Moya lowu taka ku hundzu eka vulawuri hinkwabyo bya xisayense ehandle lahaya, loko ku nga si va na athomo kumbe molekhuli, Luwa wu nga vulavula swilo hinkwaswo swi va kona. Nakona loko moy-a-xiviri wa wena wu khweketiwile eka sweswo, ku hava nchumu lexi nga wu yimisaka. Sweswo swi lulamile. “Mi nge eka ntshava ley, ‘Suka,’ nakona mi nga kanakan etimbilwini ta n'wina, kambe mi pfumela leswaku leswi mi nga swi vula swi ta humelela, mi nga kuma leswi mi swi vuleke.” Loko sweswo ku nga ri ku hetiseka ko khomelela kona! Hakunene, hi kona. Sweswo swi lulamile, ku hetiseka.

¹²⁶ Sweswi, tiko ri na ku hetiseka. Vutomi bya kaya ra wena byi na ku hetiseka. Hinkwako, loko kuri leswaku byi ta pfuka byi kumile xin'wana na xin'wana, byi fanele ku va na ku hetiseka.

¹²⁷ Hi khensa gqweta leri. Hi khensa, oho, hinkwavo vavanuna lavan'wana. Mufundhis i loyi wa kahle lahwani ku suka eCalifornia, naswona i hungu ra kahle njhani! Na—na makwerhu wa hina la nga ringeta ku teka mali na swin'wana na swin'wana, ku ta ringeta ku pfuna wansati loyi wa mbuyangwani, na—na vana va yena, ku ta va ntshuxa. Sweswo hinkwaswo swi kahle. Ha swi khensa sweswo, naswona ndzi wa swona.

¹²⁸ Kambe ku na nchumu wun'we lowu nga ekule na sweswo, vanghana, loko hi ri karhi hi pfala nhlengeletano ley vusiku lebyi. Hi fanele ku wu boha eka ku hetiseka, nhlengeletano ya xikhongelo emahlweni ka Xikwembu, ley nga ta rhumela ku ntshuxa ku suka eka Yehovha Xikwembu lexi fanaka. Xa ha ri Xikwembu lexi fanaka vusiku lebyi tanahi laha a Xi ri hakona nkarhi luwa. Haleluya! Xana ma swi pfumela-ke? [Nhlengeletano yi ku, “Amen.”—Muhleri.]

¹²⁹ A hi yimeni hi milenge ya hina, manuku, naswona vusiku lebyi hi vumba nhlengeletano ya xikhongelo lahwani, kukondza ku hetiseka ku teka ndzhawu. Yimisani mavoko ya n'wina

emahlweni ka Xikwembu. Khongelani kukondza mi ba ekaya, kukondza ku hetiseka ku wela etimbilwini ta n'wina.

¹³⁰ Hosi Xikwembu, rhumela Moya wa wena lowo Kwetsima ehansi, naswona u rhumela u tlhela u ntshuxa vana lavaya lahaya, Hosi. Va tshamile eswifundzheni swa mindzhuti ya rifu. Swin'wana swi lunghekela ku humelela, Hosi, nakona ha khongela leswaku tinhlengeletano leti ta xikhongelo ti tlweba Ndzilo. Ndza Ku pfumela, Hosi. Ndzi le ku swi amukeleni, naswona ndza pfumela leswaku U ta va ntshuxa vana lavaya. Hi nyike swona, Xikwembu xa Matimba hinkawo. Hina, Kereke ya Wena, ha swi kombela, ha Yesu Kreste. Amen. 

KU HETISEKA TSO63-0304
(A Absolute)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Msumbunuku ni madyambu, Nyenyankulu 4, 1963, eCity Auditorium eHouston, Texas, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org